
ФАРҒОНАЛИКЛАРНИНГ СУЯНГАН ТОҒИ ВА ИШОНГАН БОҒИ – ТАДБИРКОРЛАРДИР!

Шу йилнинг 5-6 июнь кунлари вилоятимизга ташриф буюрган Президентимиз фарғоналик тадбиркорлар эришаётган ютуқларни алоҳида эътироф этиб, бундан буён ҳам тадбиркорлар бу борада вилоятда амалга оширилаётган саъй-ҳаракатларда бош ислохотчи бўлиши кераклигини таъкидлади.

8 июнь куни вилоят Тадбиркорлар марказида бўлиб ўтган учрашувда фарғоналик тадбиркорлар давлатимиз раҳбарининг юксак ишончига муносиб бўлиш учун астойдил меҳнат қилиш борасида ўзаро фикр алмашдилар.

- 2012 йили вилоятимизда 19 мингта тадбиркорлик субъектлари фаолият кўрсатган бўлса, бугунги кунда уларнинг сони 59 мингдан ошди, - деди вилоят ҳокими Шухрат Ғаниев. – Вилоят ялпи ҳудудий маҳсулотида тадбиркорларнинг улуши йилдан-йилга ўсиб бормоқда. Коронавирус пандемияси даврида вилоят тадбиркорлари томонидан 26,5 миллиард сўмлик ҳомийлик ёрдамлари кўрсатилди. Бугун бундай хайрли ишлари билан мамлакатимиз миқёсида жуда катта ҳурмат-эътиборга сазовор бўлаётган кўплаб тадбиркорлар номини фахр билан тилга олиш мумкин.

Шундан сўнг Шухрат Ғаниев вилоят тадбиркорларининг Мурожаатини ўқиб эшиттирди. Мурожаатда билдирилган фикрлар ва илгари сурилган ташаббуслар тадбиркорлар томонидан қизғин қўллаб-қувватланди.

Учрашувда Ўзбекистон Республикаси Президенти Администрацияси ҳузуридаги тадбиркорлар ҳуқуқларини ҳимоя қилиш бўйича ваколатли вакил - бизнес-омбудсман Дилмурод Қосимов иштирок этди.

Азимжон МИРЗААЛИЕВ, “Фарғона тиббий диагностика” МЧЖ таъсисчиси.

- Бугунги мулоқотимиз жуда ҳам самимий ўтаётганидан хурсандман. Шу даврада ўтирган барча тадбиркорлар бундай дўстона муҳитдан мамнун.

Ҳозирда тиббий диагностика ва умумий овқатланиш соҳасига ихтисослашган 4 та хусусий корхона таъсисчисиман. Корхоналаримизда бугунги кунда 230 нафар ҳамюртларимиз меҳнат қилади. Бу кейинги йилларда юртимизда тадбиркорлик фаолияти ривожига учун яратилаётган қулай шарт-шароитлар, имконият ва имтиёзлар самарасидир.

Шу боис мухтарам Президентимизнинг Фарғона тадбиркорлари бош ислохотчи бўлиши кераклиги тўғрисидаги ташаббусини қўллаб-қувватлаймиз. Ишонаманки, Фарғона тажрибаси тез орада бутун мамлакат бўйлаб кенг қулоқ ёзади.

Шаҳноза ҒАНИЕВА, “Ибратли бекам” ўқув маркази раҳбари.

- Фарғонада энг ёш тадбиркорлардан бири сифатида иш бошлаганман ва бугун бу борада 15 йиллик тажрибам бор. Ҳозирда вилоятда 10,5 минг нафардан зиёд тадбиркор аёллар фаолият кўрсатаётгани эътибор ва рағбат самараси, албатта.

Давлатимиз раҳбари ташаббусидан руҳланган ҳолда ўқув маркази, унинг қошидаги хизмат кўрсатиш ва ишлаб чиқариш фаолиятини янада кенгайтириш ниятидамиз.

Ҳаётбахш ислохотлар жараёнида фарғоналик тадбиркорлар бош ислохотчи бўлади. Бунинг учун ҳаётий тажрибамиз, билим ва салоҳиятимиз етади.

Насиба РАҲМОНОВА, “Қувасой махсус транс” МЧЖ раҳбари.

— Пандемия шароитида ҳам давлатимизнинг эътиборини ҳис қилиб, фаолиятимизни асло тўхтатмадик. Айни пайтда 5 та махсус транспортимиз бор. Яқинда имтиёзли кредит эвазига яна битта янги техника сотиб оляпмиз. Махсус чиқинди полигони ташкил этиш учун чекка ҳудуддан 2 гектар ер ажратилди.

Биз, фарғоналик тадбиркорлар давлатимиз раҳбарининг юрт тараққиёти ва халқ фаровонлиги йўлидаги ислохотларидан беҳад мамнунмиз. Шу сабабли эзгу ташаббусларига “Лаббай!” дея жавоб берамиз.

Шуҳрат Ғаниев учрашув якунида фарғоналик тадбиркорларга ҳиммати чексиз, меҳнатлари машаққатли, ютуқлари қувонарли, дея таъриф берди. Бу айни ҳаёт ҳақиқати ва йиғилиш руҳини ифодаловчи энг лўнда ва аниқ хулоса бўлди.

Фарғона вилояти ҳокимлиги Ахборот хизматиFacebook, Telegram, Веб сайт, YouTube

2020-06-09 15:18:27